


Hottingawier yn it Leechlân

by Grou biwenne troch

Pieter

Liezinga



Oan deselde J. W. de Visserwei as dert Tiemersma oan leit, fyt men efkes fierder de Wartenster kant op „Hottingawier”, biwenne troch de hear P. Liezinga. Dat brocht my efkes oan it twifeljen. Yn myn jongstiid wie Hottingawier de pleats fan Willems Diewuke, ien pleats fierder nei it Noard Easteren as de pleats fan Liezinga, hwer’t doe ek in widou buorke nl. Fokke Wikje.

Dy nammen wiene foar my biken-de klanken. Mar twa kear Hottingawier woe der by my mar min yn.

En dochs is it sa. De pleats fan Liezinga en de pleats fan S. Y. de Boer foarmje mei har beiden Hottingawier.

De pleatsen hawwe ek yndertiid hiem oan hiem lein en beide op in wier (terp), sa sil de terp Hottingawier west hawwe en de pleatsen dêrfan har namme drage.

Sokke terpen sille der yn de lege midden wis wol sin hawn hawwe, as men wit hoe’t der yn it bigjin fan dizze ieu noch tsjin it wetter fochten wurde moast.

Ik siet al gau mei de boer en boerinne oer harren pleats to praten. Liezinga, ôfkomstich út 'e Wâlden, fielde him hjir tige op syn plak. „Ik hâld fan 'e romte, fan de fiere kimen”, sei hij, „nou en dy binne hjir”.

Ik wie it mei him iens, hjir koe hy syn hert ophelje oan dy romte, mar doe't ik letter mei him op it hiem wie, koe ik sjen dat hy syn wâldtiid dochs net alhiel forgotten wie, hwant nearne sjocht men oan de Grouster kant in tún foar griende

ensfh. sa as hjir.

Doe ik dêr op wiisde sei hy: „Ja, dêr kinne wy min bûten, wy binne it wend as wy hwat nedich hawwe dit út eigen tún to heljen. Wy hawwe de groun der geskikt foar makke”.

Hottingawier fyt men yn de floreen- en stimkohieren fan Grou bij nû. 45 Eigeners en brûkers hawwe west:

1640 Harke Ruurds eigener.

1698 Pytter Abes tot Grou eigener, Tjalke Gabes brûker.

1708 As yn 1698.

1718-1728 Jacob Abes en Abe Jacobs eigeners, Jalke Gabes brûker.

1738 Jacobus Abes eigeners, Pytter Aukes brûker.

1748-1778 Vrouwe Douairière van Kamstra geboren van Kamstra en Pytter Alberts erven eigener, Thomas Asmes brûker.

Yn 1748 wie Tjerk Oenes brûker en yn 1768 Anne Siezes.

1788 Van Sminia eigener, Durk Hilles brûker.

1798 Selde eigener en brûker.

1818 Jacob Jorna eigener, Maye y Hogedoorn brûker.

1828 Selde eigener, Pieter v. d. Meer brûker.

1838 Selde eigener en brûker.

1848 Selde eigener; Ale Sikkes Koldyk brûker.

1858 Minke Jacobs Jorna, widd. Ype Cornelis Zetsema 11/12 part eigenerske en erven Ype Cornelis Zetsema 1/12 eigener, Bouwe Ypes Ringnalda brûker.

Sa wie it oan't 1858 ta. Hoe lang Ringnalda der wenne hat is my net bikend. Yn 1895 wie op dizze pleats boerinne widd. Van der Meer, doe al net jong mear. Har opfolger hat west Lykle Adema en yn 1925 kaamen Kornelis Koopmans en Pietje de Boer hjir to wenjen.

Fan 1945 oant nou buorkje Pieter Liezinga en Jeltje v. d. Laan hjir.

It eigendom fan de pleats is fordielde. Liezinga brûkt 71 pounsmiet lân, hjir fan is it hûs mei 25 pounsmiet eigendom; 22 pounsmiet is eigen aan de famylje Jensma en 20 pounsmiet aan it Boereforsekeringsfouns. Letter hat Liezinga der noch

fjouwer pounsmiet by köcht.
Earder wie eigener de hear Kornelis Koopmans.

Sa buorket dêr nou de famylje Liezinga boer en boerinne, bystien troch in soan. Ek hjir witte se wol hwat se dwaen moatte hwant der wurde 31 melke kij hâlden. „Lokkich”, seit Liezinga, „it lân leit op 4 pounsmiet nei oan ien kavel en sa as jo sjogge, de rûchskerne litte wy oer it lân bringe”. Dêr wie in leanbidriuw mei dwaende.

Alles wie hjir fol goede moed.

d.H.